



Komunikadu Imprensa
09 Agostu 2022

Tribunál Distritál sira hahú tama ba feriadu judisiáriu

Hahú husi 01 Agostu to'o 15 Setembru 2022, tribunál distritál sira tama ba feriadu judisiáriu no sei reativa fali julgamentu hanesan normal iha 16 Setembru 2022.

Mezmu tribunál tama ona ba feriadu judisiáriu, maibé julgamentu ba kazu urjénsia hanesan prosesu sumáriu, arguidu prezu no primeiru interrogatóriu inklui kazu sivíl providénsia kautelár nafatin la'ó. Ho nune'e, autór tribunál sira (juis, prokuradór no defensor) inklui ofisil justisa ne'ebé turnu sempre marka prezensa iha sira nia eskritóriu hodi kontinua atende kazu sira urjente, nune'e sei la fó implikasaun ba direitu arguidu no lezadu sira nian atu hetan justisa.

Alende ne'e prosesu sira ne'ebé mensiona iha leten, tribunál mós kontinua hala'ó prosesu julgamentu ba kazu kontinuasaun sira ne'ebé marka ona durante feriadu judisiáriu atu la lakon efikásia husi prosesu ne'ebé la'ó ona, bazeia ba artigu 250 Kódigu Prosesu Penál alinea 5 ne'ebé dehan katak audénsia interrompida ka suspense sei la'ó filafali, hahú iha aktu prosesuál ne'ebé halo ikus liu, maibé kuandu audénsia la bele la'ó filafali iha lora tolu nulu nia laran, prova ne'ebé prodús tiha ona iha audénsia lakon efikásia.

“Tempu feriadu judisiáriu ne'e fiksa ona kada tinan iha 01 fulan Agostu to'o 15 Setembru nune'e iha oportunidade ba autór judisiáriu sira hodi pasa sira nia direitu ba ferias hodi bele deskansa husi pezu serbisu ne'ebé durante ne'e sira halo,” dehan Diretora Ezekutiva JSMP, Sra. Ana Paula Marçal.

JSMP hanoin katak feriadu judisiáriu ne'e importante tebes ba autór judisiáriu sira, Nune'e JSMP hein katak depoisde feriadu autór judisiáriu sira sei kontinua serbisu ho hanoin no espíritu foun tuir dever no direitu ne'ebé konsagra ona iha konstituisaun no lei oan sira.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>